

# Kim Sai: Gerakan akan hanya jadi parti pemecah jika...

Bahan asal dari Arkib

Negara Malaysia

SUNGAI PETANI, Isnin — Gerakan hanya akan menjadi sebuah parti pemecah perpaduan sekiranya parti itu tidak dapat menyelesaikan masalah-masalah kaum China di negara ini, kata Ketua Pergerakan Pemuda MCA, Datuk Lee Kim Sai semalam.

Katanya: "Parti Gerakan boleh wujud jika ia boleh membantu M C A untuk menyelesaikan masalah kaum China."

"Sebaliknya jika Gerakan semata-mata berfungsi merosakkan perpaduan sesama kaum China di negara ini, ia lebih baik tidak wujud", katanya di majlis jamuan makan malam MCA di Bedong 10 batu dari sini.

Turu hadir di majlis itu ialah Menteri Pengangkutan yang juga Presiden MCA, Datuk Lee San Choon.

Menurut Datuk Lee, selama ini gerakan mendakwa parti itu berjuang untuk semua kaum di Malaysia tapi hakikat sebenarnya ahli-ahli parti itu terdiri dari orang-orang China saja.

Hal ini, katanya, menunjukkan matlamat yang tidak sejajar dengan apa yang sebenarnya berlaku di dalam parti itu.

"Rakyat keturunan China sepatutnya jangan terpedaya dengan omong kosong seperti itu," katanya.

Beliau memberitahu, usaha MCA untuk membaiki keadaan rakyat keturunan China adalah baik tapi malangnya ada kalangan orang China sendiri cuba menghancurkannya.

Sementara itu, Datuk Lee San Choon dalam majlis itu telah menerima penyertaan 1,677 ahli baru MCA dari Kedah Tengah.

Ahli-ahli itu 323 dari Bedong, 359 Sungai Petani, 250 Jerai, 218 Bakar Arang, 137 Gurun, 114 Merbok, 87 Semeling dan Bukit Selambau.

Datuk Lee yang juga Menteri Pengangkutan, berkata, penyertaan ahli-ahli baru MCA ini menandakan parti itu terus mendapat sambutan rakyat khususnya di Kedah.